

Kosovo NATOren erantzuna

Kosovoko herriei erasotzen segitu dute serbiarrek

Nazio Batuetako langileek alde egin dute, Gurutze Gorrikoak geratu egin dira

Agentziak / Pristina

NATOren erasoak oraindik hasi gabe zirelarik, Jugoslaviako Armadak jendetza albaniarreko hainbat herri bonbardatu zituen atzo. Berri hori Albaniar Informazio Zentroak eman zuen (KIC), eta ez zen beste iturri batez baieztatua izan, OSCEko begiraleak martxoaren 20tik alde eginak baitaude Kosovotik.

KIC Albaniar Informazio Zentroak emandako datuen arabera, Jugoslaviako Armadak kanoiez eraso die Kosovoko hainbat herriri, Podujevo eta Vicitrn (iparralde), Kacanik (hegoaldea) eta Decane (mendebalde) inguruneetan. «Aldiz, Drenican inork ez daki zehazki zein den egoera», aitortu zuen KICEko eldunak. Kosovo erdialdean da Drenica, eta UCK-ko gerrillariak han dute gotorlekutako bat, eta iragan aste amaieraz geroztik Belgradeko indar armatuak erasotzen hasi dira. Albaniarren aldetik jakinarazi zuten azken hiru egunotan Drenicako 30 bizilagun hil direla eta hogei bat baino gehiago zauritu.

Ibrahim Rugova Kosovoko albaniarrek aukeratu zuten presidentearen eldunak, Xhemal Mustafak, zinki eskatu zuen atzo NATOk indarrek eraso egin diezaten serbiar militarrei, bere iritzian «argi baita Belgradek ez duela inolako borondaterik konponbide politiko bat emateko Kosovoko gatazkari».

Errusiako Atzerri ministro Igor Ivanovek, bere aldetik, «zuhurki jokatzeko» deia egin zien Jugoslaviako agintariei, haren ustez Kosovoko albaniarrek «suari su ematen» ariko baitira NATOren eskuhartze militar bat justifikatzearren.

CICR-koek Kosovon geratzea erabaki dute

Ipar Atlantikoko Aliantza Militarren erasoek serbiarrendandik eragin lezaketen ihardukitzei aurrea hartzeko gisan, giza laguntzako erakunde gehienek alde egin dute azken egunotan Kosovotik. Hala izan da behintzat Nazio Batuei lotutako erakunde kasuan, UNHCRko eldun batek atzo Genevan azaldu zuenez. Errefuxiatuen sustengurako erakunde horretako kideek eta Munduko Elikadura Programako (PAM) eta Unicef Nazio Batuen Haurren Laguntzarako Fondoko kideek ere Kosovotik alde egin zuten herenegun.



DAVID BRAUCHLI / AP

Pristinako herritarrek, ogia erosteko ilaran, atzo goizean.

Gurutze Gorriaren Nazioarteko Batzordeak (CICR), aldiz, herrialdean geratzea erabaki du, laguntza ekarle erakunde horren eldun batek, Suzanne Bergerrek, baietsi zuenez atzo. Bergerrek zehaztu zuenez, CICR-ko 20 lagun geratu dira Pristin (Kosovo), 13 Belgraden eta hiru Podgorican (Montenegro), eta «nahi dugu geratu edozein beharri erantzun-teko gisan», gehitu zuen CICR-ko bozeramaileak.

Pristinan bizi zen giroari dagokionez, jakin zen deia-darrak entzun zirela 13:10ean lehendabizi eta orduz geroztik beste hainbat aldiz ere. Serbiar agintarien tokiko arduradun batek azaldu zuenez, proba egiteak besterik ez ziren izan, baina deiadar horiek beldurra eragin zuten herritarren artean eta lurpeko babeslekuetara sartu ziren trumilka.

Mazedoniak ireki die berriz muga iheslariei

■ ASTEARTE arratsan Kosovorekiko muga ixtea erabaki ondoren, Mazedoniako agintariak berririo irekiarazi zuten atzo. Hala, Tabanovceko postuan, Kumanovo hiritik 14 kilometro, Kosovotik ihesi joandako 800 albaniar inguruk pasatua zuten muga atzo eguerdirako. Iheslari horietatik gutxi gehienak emakumeak eta

haurrak ziren, eta oso puska gutxi-ekin zetozen. Bi albiste kontrajarri baziren berririo muga irekitze horri buruz. Batak zioenez, Mazedoniako mugazainek agindua zuten azken egunotan borroka gertatzen ari diren Kosovoko herrialdeetatik etortzen diren albaniarrek bakarrik sartzen uzteko. Gurutze Gorriko itu-

rriek segurtatzen zuten, aldiz, Kosovoko edozein bizilagun- ni uzten ziotela Mazedonian sartzen mugazainek.

Dena den, bai Gurutze Gorriko kideek bai Europako Batasuneko begiraleek kontrolatzen zuten Kosovoren eta Mazedoniaren arteko muga, hura igartzeko nekeziarik ez zela ziurtatzeko. Ezen, astearte arra-

tsean Skopjeko agintariak manua eman zuten muga ixteko eta hala geratu zen zenbait orduz.

Erabaki horren ulertzeko jakin behar da azken garaiotan Kosovotik ihes egin duten 25.000 albaniarretatik gehienak Mazedoniarat jin direla eta egoera horrek neke batzuk eragiten dizkiela Skopjeko agintariei.